



Inatsisartunut ilaasortamut  
Anders Olsen  
Siumut

29-11-2023  
2023 - 28529  
Postboks 930  
3900 Nuuk  
Tlf. (+299) 34 68 00  
Fax (+299) 32 43 02  
E-mail: asn@nanoq.gl  
www.naalakkersuisut.gl

## **Kalaallit Nunaata kujataani aatsitassarsiorluni suliassat pillugit § 37 naapertorlugu apeqquteqaammut nr. 163-2023-mut akissut**

Inatsisartut suleriaasianni § 37, imm. 1 naapertorlugu matuma kinguliani allassimasunik Naalakkersuisunut apeqquteqarputit, matumuuna akineqartunik.

### **Apeqqut 1:**

**Nanortallip eqqaani kuultisiorfiup tunisassiulernissaa qaqugu aallartissava?**

**1a) Aatsitassarsiorfiusinnaanera ukiuni qassini maannamut missingersuutaava?**

**1b) Kuultisiorfik inunnik qanoq amerlatigisunik sulisoqarnissaa naatsorsuutigineqarpa?**

### **Apeqqut 1-imut akissut:**

Piiaanissamut akuersissutini piffissamut killigititat arlallit aalajangersarneqartarput, ilanngullugu aamma piiaanerup aallartinnissaanut piffissamut killigititaaq. Piiaanissamut akuersissut 2003-05 malillugu piiaanerup aallartinnissaanut killigitinneqarpoq 1. januar 2026. Akuersissut 24. april 2033 tikillugu atuuppoq. Tunngaviatigut taamaalilluni piiaaneq piffissami 1. januar 2026 – 24. april 2033 ingerlanneqarsinnaavoq.

Aamma piiaanissamut akuersissut malillugu pisinnaatitsissummik pigisaqartup piiaanerup aallartinnginnerani atugassarititaasut arlallit naammassisussaavai, ilanngullugit Avatangiisinut sunniutaasussanik nalilersuineramik (VVM) aamma Inuiaqatigiinni piujuaannartitsisumik ingerlatsinissamut nalilersuineramik (VSB) suliaqartussaalluni.

Nassuiaatit taakkua maannakkut suliarineqaleruttorput, aammalu naammassippata tamanut ammasumik tusarniaassutigalugit nassiunneqassallutik. Nassuiaatit suliaqartussanut najoqqutassat, 2020-mi decembarimi tamanut ammasumik piareersaataasumik tusarniaassutigineqartut, tunngavigalugit suliarineqarput. VSB-imut suliaqartussanut najoqqutassami allassimavoq, suliassami toqqaannartumik suliffissaqartitsinermi sanaartorerup immikkoortuani inuit 70-80-it aammalu ingerlatsinerup immikkoortuani inuit 150-it sulisorineqassasut, pisinnaatitsissummik pigisaqartup naatsorsuutigigaa.

Suliakkiussanut najoqqutassat allallu tusarniaanermi najoqqutassat  
Naalakkersuisut tusarniaanernut iserfissiaanni tamanit pissarsiarineqarsinnaapput:

Kalaallisut: [https://naalakkersuisut.gl/Hoeringer/2020/12/Nalunaq\\_Guldmine?sc\\_lang=kl-GL](https://naalakkersuisut.gl/Hoeringer/2020/12/Nalunaq_Guldmine?sc_lang=kl-GL)

Danskisut: [https://naalakkersuisut.gl/Hoeringer/2020/12/Nalunaq\\_Guldmine?sc\\_lang=da](https://naalakkersuisut.gl/Hoeringer/2020/12/Nalunaq_Guldmine?sc_lang=da)

Naatsorsuutigineqarpoq 2024-mi innuttaasunik ataatsimiititsinerit  
ingerlanneqassasut.

## **Apeqqu 2**

Nanortallip eqqaani Amitsumi aqerluusassamik aatsitassarsiornissamut suliniutip  
inerisarneqarnera sumummita killippa?

2a) Tunisassiorfiusinnaanera aallartinneqarpat, ukiuni qassini maannamut missingersuutaava  
tamanna?

2b) Amitsumi aatsitassarsiortoqalissappat inunnik qanoq amerlatigisunik sulisoqarnissaa  
naatsorsuutigineqarpa?

### **Apeqqu 2-mut akissut:**

Amitsumi suliassaq aatsitassarsiornissamut misissuineri suliassatut ingerlallualereersutut  
isigineqarpoq. Ingerlatseqatigiiffik suli paaanissamut akuersissummik qinnuteqanngilaq.  
Taamaattumik paaaneq qaqugu aallartinneqarsinnaassanersoq aalajangersimasumik  
ulluliilluni, tunisassiornerup sivilissusissaata inuillu suliffissaqartinneqartussat  
amerlassusissaannik aalajangersaanissamut siusippallaarpoq. Taamaattoq qularnanngilaq  
Kalaallit Nunaata kujataani aatsitassarsiornermi suliassat, ilanngullugu ilatigut Amitsumi  
suliassaq, najukkani inuussutissarsiornermut suliffissaqartitsiniarnermullu  
annertooujussuarnik periarfissiisinnaasut.

Apeqquumut tunngavilersuutini apeqquqartup Amitsoq aqerlusiorfissatut taavaa.  
Ileqqorissaarnissaq eqqarsaatigalugu eqqumaffigeqquneqassaaq suliassami grafit  
siunnerfigineqarmat. Grafit ilatigut biilit innaallagiamoortut batteriinut atorineqartarpoq,  
taamaattumillu mingutsitsinngitsumut allanngoriartortitsinerup qulakkeernissaanut  
pingaaruteqartumik inissisimalluni.

## **Apeqqu 3**

**Nanortallip eqqaani kultisiorfiup aammalu Amitsumi aqerluusassanik  
aatsitassarsiornissamut aningaasannorlugit ukiumut kaaviiartissinnaasaat  
missingersorneqarnikuuppat?**

**3a) Taamaappat qanoq annertutigippat?**

### **Apeqqu 3-mut akissut:**

Ingerlatseqatigiiffiit namminersortut marluk naatsorsuutitigut kisitsisinut naatsorsuutigisaat  
apeqqutigineqarput. Tamatuma § 37 naapertorlugu apeqquqqaammi samminissaa  
ajornakusoorpoq.

Ataatsimut isigalugu oqaatigisinnaavara aatsitassarsiornermik suliassanik inuiaqatigiinni  
iluanaarutissat, Inuiaqatigiinni piujuartitsisumik ingerlatsinissamut nalilersuineri  
sammineqartarmata. VSB-imut nassuiaatinik taagorneqartuni. Suliassanut marlunnut  
taakkununga VSB-imut nassuiaatinik naammassimasunik suli tiggumiaqartoqanngilaq.  
Nassuiaatit tiggumineqalerpata, nassuiaatit tamanut ammasumik  
tusarniaassutigineqartussaapput.

Inussiarnersumik inuulluaqqusillunga

*Naaja H. Nathanielsen*

Naaja H. Nathanielsen